

Felis dia di Betico

Aruba recordando un gran baluarte Betico Croes



Desde aña 1989, tur aña dia 25 di Januari Aruba ta celebra dia di Betico. Esaki ta un dia nacional caminda a dedica na un gran yiu di tera cu a marca historia pa Aruba. A scoje e fecha aki como cu e ta e fecha natal di e gran estadista

Gilberto François (Betico) Croes.

Di e forma aki Aruba por dune su honor bon merced y asina un y tur por keda recorda su lucha pa a logra Aruba su Status Aparte. E lucha cu a marca historia.

"Nos kier felicidad di nos generacionnan, nos kier felicidad di nos yunan, nos kier salba Aruba, nos kier salba nos cultura, nos kier salba nos dignidad, y nos no kier pa ningun isla, ningun pais bin domina nos, bin caba cu nos cultura, bin caba cu nos identidad, pasobra nos ta un pueblo chiquito, pero un pueblo cu tin un amor grandi pa e teritorio aki".

Como maestro di school



Gilberto François Croes, cariñosamente yama Betico, a nace na Aruba dia 25 di Januari 1938 y a fayece dia 26 di November 1986. Betico manera tur hende conoce, ta yiu di Mimita y Panchico Croes (qepd) .. Despues di su carera escolar

Betico a sigui su estudio na Hulanda na unda el a logra su diploma di maestro di school. Durante su estadia na Hulanda e tabata masha activo mes den diferente organisacion Antiyano.

Ora cu Betico a regresa Aruba el a bay traha como maestro na Colegio San Hose na Santa Cruz y despues di a logra su diploma "LO Spaans y Handelskennis" el a bay traha na Colegio San Antonio.

Na Aruba tambe, mescos cu na Hulanda, e tabata masha activo riba tereno deportivo, musical, cultural y social.

"Awe nos ta weita e banderanan aki, ta pueblonan soberano, pueblonan cu tin nan libertad. Di ainda no ta pero nos ta duna boso e garantia cu nos lo lucha incansablemente pa pone e bandera ey den fila di e paisnan soberano, pa asina garantiza e libertad di e pueblo di Aruba". Betico 1976.

Betico a bira politico



Despues di a drenta enlace matrimonial dia 18 di december 1962 cu Glenda Croes, di cual matrimonio a nace 4 yiu, ela tuma un paso importante na 1967.

Ela drenta politica activo na 1967, algo cu henter nos pueblo tabata desea y cu

semper tabata hankra na su curazon. Betico cu e paso aki a sacrifica su famia completo pa bai traha na favor di e deseo y lucha di nos pueblo.

Den e mesun aña ela worde postula como candidato no. 5 ariba e lista di AVP. For di e tempo ei e pueblo votador a conoce como un gran lider, un gran luchador pa nos causa.

Dia 1 di juli 1967 ela worde nombra como diputado y a keda ocupa e puesto aki te cu 1970. Como diputado Betico a habri un era nobo den politica na Aruba. Betico a cuminsa cu school di waiters, mirando e interes cu tabata existi pa nos turismo. Hopi yiu na di tera a obtene un beca pa bai studia den exterior pa despues bin traha pa e futuro di nos comunidad.

"Nos a dicidi di pone nos amor patrio den e lucha aki, nos creatividad, nos bida, nos energia pa nos pòr realiza e causa aki".

El a funda su partido

Dia 9 di februari 1971 MEP a ser funda na su cas y dia 14 di februari 1971 ela keda nombra como lider y presidente di MEP.

Door di su guia pefecto MEP a crece y bira e partido mas grandi di Aruba.

Pueblo di Aruba a dune y su partido e respaldo necesario pa realisacion di nos Status Aparte. Betico a kibra tur record di tur politicianan di pasado, den obtene cantidad di voto.

Betico ta e politico cu mas tanto voto a haya riba su nomber.

Desde September 1973 e tabata lider di e fraccion di MEP den Staten di Antiyas.

Despues di eleccion di 1975 ela keda nombra como consehero general di Bestuurscollege di Aruba. Tambe Betico tabata miembro di Parlatino (Parlamento Latino Americano)

SALE
50%
OFF
TODAY





Felis dia di Betico

Betico a percursa pa Aruba su propio Himno y Bandera




Betico, como Consehero General di gobierno insular di Aruba e tempo ei, a conseha e gobierno insular pa percursa pa Aruba tin su propio Himno y Bandera oficialmente. Duro a worde traha y hopi critica, manera semper, Betico a hanja, pero awe nos tur ta orguyoso cu nos isla, pa chiquito cu e por ta, tin su propio Himno y Bandera.

Despues cu tanto Hulanda como Nacionnan Uni a conseha govbierno insular di Aruba pa organisa un referendum pa sa exactamente e berdadero deseo di nos pueblo, Betico hunto cu e diputadonan a percursa cu e

referendum lo tuma lugar. No solamente Betico tabata desea di sa e deseo exacto di nos pueblo, pero como politico responsabel pa cu e futuro di Aruba, a mira esaki necesario. Ela percursa e tempo ey pa duna nos pueblo tur informacion cu nan tabata desea. Pueblo no solamente a bay vota den referendum simplemente como simpatisante di nos lucha, pero despues di a haya tur clase di informacion y tabata convenci cu esaki tabata pa salvacion di Aruba. Despues di e referendum henter mundo tabata na haltura di e deseo di e pueblo Arubiano..

E prome politico cu a kibra tur clase di descri-minacion



Betico tabata ser stima y admira pa chiquito y grandi y e tabata e prome politico den Antiyanan Hulandes, cu a kibra tur clase di descriminacion entre raza, religion y clase.

Betico a pone un piedra firme na e fundeshi pa construccion di e pais Aruba. Cu un bandera y himno, un pueblo ta sinti cu realmente nos ta un pais cu tur balor y honor y esaki Betico tabata kier pa mira e pueblo cu propio identidadnan y simbolonan.

Nos tabata tin un himno pa canta cu tur forza y cu ta sali for di profundo di nos curazon. Nos tin un bandera cu ta duna nos e motivacion pa sigi studia, traha duro, sea ciudadano sano y conciente, bon deportista, hiba number di Aruba pa medio di nos bandera mas halto posibel.

Desde cu e pueblo a haya su propio Himno y Bandera, e ciudadanonan nan sentimentonan pa ser Arubiano di berdad, a crece.

Nos a bira un pueblo unico y un pais diferente compara cu otro paisnan.

Muestra di esaki ta e.o. mantene nos pais limpi, papia libremente como berdadero Arubiano, studia mihor, fundacionnan pa traha ariba diferente terenonan, cuida nos cultura, reviva custumbenan di antes.

Dande y dera gai a bolbe na grandi. Nos pueblo a bira un gran pueblo.



Telefonnan di DIARIO
582 6747 / FAX 582 8551